

衢州文獻集成

〔史部〕

第
96
冊

衢州文獻集成

黃靈庚 諸葛慧艷

主編

〔史部〕

第
96
冊

國家圖書館出版社

(明)徐日久撰

五邊典則二十四卷
(卷十五至二十)

明刻本

第九六冊目錄

五邊典則二十四卷(卷十五至二十)

(明)徐日久撰
明刻本

.....

五邊典則卷之十五

信安徐曰父子卿父集

勾餘施邦曜爾諧父

全輟

閩漳張熒紹和父

弘治十一年五月虜數百騎駐肅州境外之
給刺兀速泉將入寇分守右叅將楊翥率千
戶田志深調漢番兵迎擊之虜遁去翥等追
至黑山兵備副使李旻亦率衆至合兵與戰
敗之又追至夾山及瑣瑣林皆敗之斬首四
十級獲馬二百四十一匹噐仗千數鎮守太

監陸閭等以捷聞

命寫勅獎勵

七月總制邊務太子太保左都御史王越率師襲賀蘭山後虜賊先是

勅諭總制越云賀蘭山後乃虜賊窠穴累次寇邊皆自彼而入使其居在年久熟知地方或誘引北虜大衆或招徠野乜克力等夷爲患不小須運謀追勦毋令滋蔓起自寧夏遣將分路發兵延綏副總兵都指揮同知朱瑾領

兵二千出南路監夏鎮守太監張佃總兵官
都督同知李俊領兵二千出中路副總兵都
指揮使張安監鎗右監丞郝善領兵二千出
北路越居中制之張安郝善分爲二哨北哨
行五十餘里至花果園遇賊擊之斬首十三
級南哨至蒲草溝賊望見畜產遍野棄不顧
急從沙窩遁去七人不及斬之其一人衣甲
居幙甚整意其酋也合兵追至大把都城集
其衆分爲三百併力馳突我軍下馬用鎗斃

禦之賊稍却騎乘勢急擊之斬十級日脯張
安收兵回伏兵道傍賊來襲遇伏走和善領
兵截其去路復追斬八級又追至柘溝兒斬
三級賊西遁乃還寧夏城凡得賊首百十二
駱駝十九馬百二十二牛羊噐仗千數是役
也安善功爲多兵部上其事擬官軍陞二級
者二人陞一級者四十七人陞署一級者七
十三人給賞者千六百三十五人

上俱從之加越少保兼太子太傅左都御史如

故陞張安和善官各一級賞張佃李俊朱瑾
及領兵叅將吳江督餉僉都御史張禎叔管
糧僉事李端澄銀幣有差

九月總制邊務左都御史王越等上慮置哈
密事宜大意鎮邊疆者當率舊章服夷狄者
當用世族哈密乃我

太宗開建之國陝巴寶故忠順王脫脫之族孫
土魯番不道劫而殺之致

王師遠征今阿黑麻悔罪陝巴來歸若棄哈密

不復非所以率舊章置陝巴不用非所以用
世族臣等之愚以爲仍置封陝巴爲忠順王
令率所部還居哈密原

賜陝巴金印冠服表裏銀絹等物收貯肅州者
請皆給之其哈密夷衆所須脩城器具及口
糧牛具穀種之類臣等當量濟之又回回頭
目罵亦虎仙等及罕東赤斤所屬城堡番達
頭目人等或協守哈密或互爲聲援并小列
禿等夷素與哈密輔車相倚者請各給賞以

慰其心更請

賜陝巴貴重服色以示殊恩至哈密都督奄克
孛刺等宜令與陝巴和親他種頭目迭力迷
失等宜令仍居苦峪章下兵部會官議奏
請如越所言

上從之命加賜陝巴大紅蟒衣

命擇可往哈密賁賜者二人以聞兵部因復言
使臣不遣爲便以回回通事官二人應命從
之

十二年六月致仕都督同知魯鑑陳四事一
甘肅孤懸河外三面皆番夷戎虜之地雖設
衛所無險可據比來邊圉多事各衛軍士消
耗過半有警未能捍禦或調延綏各邊人馬
策應比至賊已遁矣募軍之令雖下緣差役
繁重人不樂從至以本衛投報之人遷撥別
衛應役尤拂人情切見各衛步操軍士止應
雜差有警不令出戰西寧一衛田土肥饒人
力頗盛芻粟無轉輸之難加以各處流民分

住成業多勢家影射在官不得其用乞

命官勾考各衛原額軍數有缺俱視近例募人
補之衛所惟其所便或選步操軍士領馬或
借空閒人丁防守其影射流民或編管守城
或填補步操應募及借助之人止在本城與
近地守備卻以舊操習熟者從近調撥缺兵
之處庶免徵發之勞一甘肅自洪武初止設
行都司衛所屯聚重兵且耕且守後因戎虜
侵掠始設鎮巡等官於時共在一城事權不

分後涼州增設副總兵一員協副二員甘州
又增左副總兵肅州莊浪俱改任叅將今永
昌又增遊擊鎮番亦增叅將兼有分守分巡
兵備等官政出多門各不相下將愈多而邊
事愈廢乞量裁減以一事權一邊方軍士征
哨正役外有朋合馬價自備椿頭採辦秋青
草脩置軍器及各衛所首領官皂隸柴價之
需其他無名之征不急之役不可勝計盡以
歲給衣糧償補雖有餘丁貼軍之例所司各

急其私漫不省恤尺籍之家財力俱屈正軍
次亡餘丁避匿軍伍消耗職此之由乞罷無
名之征申貼軍之例仍量給茶銀以助買馬
之用一陝西自近年災旱相仍民多缺食甘
肅邊患未紓歲計之外支費萬餘猶爲不足
比調集延綏等處兵馬應援所費無筭未嘗
成功今永昌遊兵及甘涼備禦洮岷河三衛
客兵西寧調補莊浪官軍本鎮與戍所皆重
支糧草似爲浪費乞以永昌等兵遊兵退回

各衛所操守却以甘涼備禦客兵及西寧調
補官軍俱徑調永昌相兼主兵防禦庶可節
邊儲而蘇民困兵部覆奏謂所言多可行其
流民影射請令三丁選一丁編管守城有願
補步操軍役者亦聽其便衛所首領官柴薪
命布政司收貯忒任官柴薪銀及西安等府餘
糧價給之其裁省將臣罷遊擊兵二事請下
鎮巡等官議處以聞從之

八月西寧罕東衛羌師等族攻劫西寧隆奔

等族掠太

諾勒甲及人畜器械等物甘肅守臣以聞兵部
計行兵備副使潘楷守備指揮使魯鐸各戴
罪殺賊仍令罕東衛都督宣諭其下俾歸所
掠以息爭解怨不聽則隨機進勦仍具奏處
置從之

十二月分守莊浪等處左叅將都指揮魯麟
奏西番巴沙等十三族日漸猖獗至暗卜碑
界侵莊浪哨營寇鎮羌諸堡雖有哨備官軍